



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

**Komunikadu Imprensa**  
**Tribunál Distritál Dili**  
**29 Jullu 2016**

**JSMP preukupa ho sentensa iha kazu abuzu seksuál ba menór ne'ebé kiik liu hosi pena mínimu iha Kódigu Penál**

JSMP preukupa ho sentensa iha kazu abuzu seksuál ba menór ne'ebé deside iha 19 Jullu 2016, iha Tribunál Distritál Dili tanba sentensa ne'e la tuir padraun kona-ba pena mínimu iha Kódigu Penál. Tribunál kondena arguidu AA ho pena prizaun tinan 6 tanba arguidu provadu komete krime abuzu seksuál agravadu hasoru lezada ne'ebé foin tinan 11.

*“Desizaun ne'e konstitui insensibilidade forte ba labarik sira nia situasaun no falla atu proteze labarik vítima sira tuir lei haruka. Tribunál tenke asegura katak desizaun tuir lei no iha efeitu atu halo ema tauk hodi komete krime hanesan iha sosiedade no asegura trankualidade públiku,”* dehan Luis de Oliveira Sampaio, Diretór Ezekutivu JSMP.

JSMP observa katak sentensa ne'ebé tribunál aplika ba arguidu kiik liu hosi agravasaun datoluk tuir artigu 182 Kódigu Penál hosi limite pena mínimu no máximu ne'ebe deskreve iha artigu 177 letra (2) Kódigu Penál. Tuir lei pena mínimu depoisde agrava datoluk mak pena prizaun tinan 6 fulan 8, la'os tinan 6.

Tribunál prova arguidu kontra artigu 177 (2) kona-ba abuzu seksuál ba menór ho aktu seksuál relevante ho labarik ne'ebé seidak tinan 14 ho moldura penál tinan 5 to' o 15 no artigu 182 (1) letra (a) kuandu vítima nia idade kiik liu tinan 12 sei agrava datoluk hosi pena mínimu no maximu ne'ebé define iha artigu 177 (2).

Tribunál prova bazeia ba lezada nia deklarasaun no depoimentu hosi lezada nia inan no aman. Entretantu, arguidu nega faktus iha akuzasaun ministériu públiku.

Rua setubal, Colmera, Dili Timor Leste  
PoBox: 275  
Telefone: 3323883 | 77295795  
[www.jsmp.tl](http://www.jsmp.tl)  
Facebook: [www.facebook.com/timorleste.jsmp](https://www.facebook.com/timorleste.jsmp)  
Twitter: @JSMPtl



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

Antes ne'e JSMP mós lamenta ho desizaun pena prizaun tinan 6 fulan 8 ne'ebé Tribunál Distritál Dili hatun ba arguidu krime abuzu seksuál hasoru lezada ne'ebé foin tinan 4\*.

JSMP observa katak kada loron violénsia hasoru fetu no labarik, partikularmente abuzu seksuál hasoru labarik kontinua buras ba bebeik. Tanba ne'e Tribunál tenki sensitivu ho realidade hirak ne'e liuhosi sentensa ida-ne'ebé iha kbiit atu proteze labarik sira no atu rekupera sira nia sofrémentu.

JSMP konsidera katak desizaun kazu ne'e mínimu tebes no la refléta konsekuensia psikólojia ne'ebé vítima infrenta nune'e JSMP husu ba Ministéiru Públiku nu'udar na'in ba asaun penál atu rekursu kontra desizaun ida ne'e tanba tribunál foti desizaun kiik liu pena limite mínimu.

Ministéiru Públiku akuza katak, iha 25 Outubru 2014, maizumenus kalan boot, arguidu nu'udar empregadu ba iha lezada nia aman, tama ba iha lezada nia uma laran no hare lezada ho nia inan toba hela iha sala laran. Arguidu hakbesik a'an ba lezada no kolu lezada nia kalsa no ropa laran to'o iha lezada nia ain. Maibé derepente lezada hakfodak tanba arguidu nia liman kona iha lezada nia kelen. Lezada hakfodak wainhira hare arguidu hamrik hela iha nia oin. Lezada fanu nia inan, maibé lezada nia inan la hader.

Depoide ne'e, lezada hader, dada nia kalsa no halai tama ba iha kuartu laran hodi fanu nia aman. Lezada nia aman hader no hakat sai mai sala laran no hare arguidu halai sai dadaun ba liur no subar hela iha lezada nia aman nia kareta kotuk. Lezada nia aman kaer arguidu no dada arguidu tama ba uma laran hodi husu arguidu. Iha dadersan, lezada nia aman lori kazu ne'e ba apresenta iha polísia no hahú prosesu hasoru arguidu.

Kazu ne'e rejista iha Tribunál ho Númeru Prosesu : 0168/14. DIBCR, ne'ebé prezide hosi representante juis kolektivu, Dr. Antoninho Gonçalves no ministéiru publiku representa hosi Dr. Hipolito Exposto Santa. Enkuantu arguidu hetan defeza hosi defensoria públiku, Dr. Rui Guterres.

---

\* Favor lee Komunikadu Imprensa JSMP, ediasaun 22 Jullu 2016 ho titltu: [Tribunál kondena arguidu kazu abuzu seksuál hasoru labarik tinan 4 simu pena prizaun tinan 6 fulan 8. JSMP: desizaun ne'e dook hosi justisa ba vítima – 22 Jullu 2016 ka bele vizita direita iha link ne'e](http://jsmp.tl/wp-content/uploads/2016/01/Pr_Abuzuseksualbaidademenortinan4_Tetum.pdf)  
[http://jsmp.tl/wp-content/uploads/2016/01/Pr\\_Abuzuseksualbaidademenortinan4\\_Tetum.pdf](http://jsmp.tl/wp-content/uploads/2016/01/Pr_Abuzuseksualbaidademenortinan4_Tetum.pdf)



JUDICIAL **SYSTEM** MONITORING PROGRAMME  
PROGRAMA MONITORIZASAUN BA **SISTEMA** JUDISIÁRIU

Atu hetan informasaun liutan favor kontaktu direktamente:

Luis de Oliveira Sampaio  
Diretór Ezekutivu JSMP  
E-mail: [luis@jsmp.minihub.org](mailto:luis@jsmp.minihub.org)  
Telefone: 3323883 | 77295795

Rua setubal, Colmera, Dili Timor Leste  
PoBox: 275  
Telefone: 3323883 | 77295795  
[www.jsmp.tl](http://www.jsmp.tl)  
Facebook: [www.facebook.com/timorleste.jsmp](https://www.facebook.com/timorleste.jsmp)  
Twitter: @JSMPtl